

四庫全書

集部



欽定四庫全書

集部

東澗集卷九

詳校官庶吉士<sub>臣</sub>瑚圖禮

主事<sub>臣</sub>呂雲棟覆勘

謄錄貢生<sub>臣</sub>郭壩



欽定四庫全書

東澗集卷九

宋 許應龍 撰

狀

辭免吏部侍郎奏狀

疏寵過優撫躬增惕竊以左銓之職實專選調之司用  
比例則與法制以相違拘資格則恐賢愚之同滯能勝  
茲任必惟其人既已試之罔功豈真除之敢望伏念某  
識最為下才不及中庀職成均莫副教養作成之責代



言禁掖慙無討論潤色之工復兼攝於選曹實難當於  
隆委甄別流品固無冰鑑之明銓綜公平未若權衡之  
審深虞曠敗以速顛隳忽叨誤渥之頒俾正貳卿之秩  
用過其量愧淦於榮伏望聖朝收還成命畀詳練清通  
之士往服厥官庶長短大小之才各稱其職所有恩命  
臣未敢祇受

辭免除權兵部尚書奏狀

疏寵過優撫躬增惕竊以六曹之長實參八座之聯司



喉舌以納言允為要職上星辰而聽履密侍清光非得  
真才曷膺茲選伏念臣受才樗散植性素昏筮仕凡三  
十年立朝已二八載誤辱九重之簡眷俾兼數職之清  
華成章不知所裁曷代王言而潤色詳說將以反約莫  
裨聖學之緝熙矧司銓綜於劇曹尤乏精明之藻鑑倏  
叨成渙濫玷文昌退省其私若何報稱用過其量必速  
顛隳伏望睿慈收還誤渥亟量能而授職改畀時髦使  
率屬而佐王以平邦國



辭免兼侍講奏狀

臣談經廣廈愧無啓沃之功錫命中宸誤沐褒遷之寵  
顧僥踰之過甚雖庸懦以知辭伏念某初乏技能濫蒙  
知獎銓曹詞掖既荐叨選任之公講殿書帷復俾輔緝  
熙之學第慙寡見恐負隆恩謂莫善於詩固當以意而  
逆志然未燭厥理豈能因事以獻言遽令升進讀之班  
何以副殊常之眷伏望收回新渥改畀時髦言古而驗  
於今必有格君之益著心而入乎耳無非經世之規



第三馬祠奏狀

奏牘荐陳俞音尚閔制命為義既未忍於棄捐事君以  
忠詎敢懷於進退然久叨於清選愧莫効於微勞福過  
留生倏復有采薪之患心慙形悴豈宜陪持橐之聯苟  
戀寵榮必遭指議輒僭伸於三瀆期仰徹於九重欲望  
朝廷特賜敷奏別求時彥俾居華要之班亟畀叢祠庶  
遂休閒之願

表



請皇帝上壽表

天祐民而作君適屆千秋之節臣歸美以報上蓋稱萬  
壽之觴修拜宸章免循彝典敢率垂紳之衆偕陳奏牘  
之恭恭惟皇帝陛下緯武經文勵精更始攬萬機而親  
政聽斷惟勤正五事以承天嚴恭自度慮乾象未循於  
躔次期邊陲亟底於奠安肆筆成書欲昭至意奉卮為  
壽姑寢盛儀雖彰聖德之隆謙昌副臣心之深願况燧  
昌而艾特伸善頌之忱非耽樂之從奚損欽崇之實冀



垂淵聽勉率舊章俾陳漢殿之儀虔致堯封之祝大德  
得壽永觀萬國之咸寧和氣致祥行見五星之同色

第二表

思至德以承天雖堅宸意祝聖人而使壽難輟彝儀荐  
輸懇款之忱冀動穹窿之聽恭惟皇帝陛下察文審已  
體仁長人長發其祥適屆誕彌之月俾耆而艾盍伸善  
頌之辭尚閔俞音莫殫衷悃再斯可矣敢稽奏牘之陳  
皇則受之庶展稱觴之慶願頒睿旨俯徇衆情呼萬歲



者三當同高岳方千里者九盡入輿圖

第三表

萬年受祐盡伸祝頌之忱一禮成文荐闕允俞之命敢  
輸丹悃疊叩紫宸恭惟皇帝陛下齊聖廣淵剛健中正  
誕彌厥月適逢載夙之辰俾熾而昌願介無疆之祉乃  
嚴恭以自度屢謙遜而不遑然四海均懽恩霑露於湛  
露豈一人有慶觴未舉於凌煙不辭三瀆之煩仰徹九  
重之聽冀從衆志勿替舊章使壽使富而多男當上堯



封之祝宜民宜人而受祿載賡周雅之詩

賀皇帝正旦表

三陽交泰適當五始之書百辟承休咸致萬年之祝叨  
居外服敢控衷忱恭惟皇帝陛下繼紹皇圖緝熙聖學  
法天立道徧覆包涵與物為春對時茂育式逢獻歲備  
擁休祺臣託迹南邦傾心北極綵旗簇仗莫陪濟濟之  
清班白獸發尊第想巍巍之高論

賀皇太后正旦表



月正元日適當歲籥之新天相慈宸茂擁春祺之介提  
封萬里贊喜一詞恭惟皇太后陛下功邁媯皇德參文  
母含洪光大獨居太極之尊富壽康寧備極九州之奉  
三陽交泰萬福來崇臣濫剖竹符欣逢穀旦五百里綏  
五百里甸莫陪長樂之班八千歲春八千歲秋當效華  
封之祝

賀皇帝冬至表

朔旦冬至適陽氣之潛萌聖德日新宜休祺之畢集紳



綏交賀夷夏均懽恭惟皇帝陛下清明在躬緝熙講學  
時和玉燭三光全而寒暑平瑞應金穰五穀熟而人民  
育式臨亞歲茂介繁禧臣假守鳳城阻陪駕列去天益  
遠猶隔弱水而望蓬萊迎日初長但向太陽而傾葵藿

賀皇太后冬至表

至朔同日謂之章適逢佳會壽考萬年介爾福咸慶慈  
宸暢和氣於兩間溢歡聲於四表恭惟皇太后陛下齋  
明雖肅富壽康寧載物含洪脗合坤元之德對時發育



助成震子之仁當一陽之潛萌宜諸福之畢至臣景迎  
南陸目睇東朝五百里綏班阻陪於玉筍三千年實算  
願比於蟠桃

賀雪表

同雲布獲適當十月之良叶氣薰蒸散作六霙之瑞輝  
華飾物枯槁生春恭惟皇帝陛下妙道難名真機默運  
財成天地無私覆私載之偏嘘吸陰陽協時燠時暘之  
證歲功攸敘農扈告豐惟皇穹隆申命之休故嘉瑞復



應期而至瓊田玉宇上下交輝桂海冰天氣埃盡洗茲  
實至和之感召益彰聖德之昭融臣等密邇清光獲沾  
餘潤雖實堅實好已占多黍之祥然載渴載饑當念采  
薇之戍

瑞慶節賀表

十月為陽紀千秋之令節一人有慶沸四海之懽聲咸  
罄衷誠仰祈睿算恭惟皇帝陛下施仁發政偃武修文  
叶氣薰為太平上接百王之緒孫謀以燕翼子下垂萬



世之基無疆惟休自今以始臣偏城濫攝華旦忻逢瞻  
星流電繞之祥其光不疚祝地久天長之算俾熾而昌

乾會節賀表

長發其祥上帝啓興王之運誕彌厥月真人膺出震之  
期罄海宇以交懽望雲天而請祝恭惟皇帝陛下厲精  
思治立政任人煥乎其有文章昭乎若揭日月道則高  
矣燕翼端拱于穆清天何言哉惠澤默周於普率斂時  
五福享國萬年臣方次偏城適逢華旦蓬萊隔弱水三



萬里阻造明庭上古有大椿八千秋願符睿算

又

火德應天統式昭純祐之休電光繞斗樞載紀誕彌之  
節照臨所逮鼓舞惟均恭惟皇帝陛下剛健粹精聰明  
齊聖抗志百王之上游神六籍之中燕翼子以貽謀求  
賢用吉以天下而為度偃武修文永居北極之尊高嬈  
南山之壽臣身縻符竹目斷觚稜稽首而稱萬年莫陪  
虎拜宜民而受百祿願誦周詩



天基節賀表

天生民而立之君茂啓中興之運臣歸美以報其上共  
欣載夙之辰恭惟皇帝陛下德配乾坤明並日月任人  
共政已歸齊國之侵疆用夏變夷復致單于之慕義自  
今以始俾熾而昌宜誕日之甫臨慶休祺之滋至臣縻  
身南土引睇北辰使富使壽而多男願上堯封之祝宜  
民宜人而受祿載賡周雅之詩

又



天申命而用休篤生元聖臣歸美以報上敢控衷忱仰  
瞻北極之尊願介南山之壽恭惟皇帝陛下厲精思治  
發政施仁和氣致祥已獲屢豐之慶常德立武佇收善  
勝之功嘉與含生同躋壽域電繞樞虹流渚當正月之  
始和嶽修貢川效珍罄四方而來賀臣等幸逢華旦倍  
激懽悰於萬斯年敬上再三之祝克昌厥後更祈千億  
之祥

明堂禮成賀表



類于上帝欲伸報本之儀祀於明堂爰講合祛之制神  
靈底豫華夏均懽恭惟皇帝陛下德冠百王教刑四海  
奉先思孝雖當恭默之時尊祖敬宗敢替靈承之意以  
裡以祀必躬必親越紼而行爰即九筵之地備物以薦  
式嚴三獻之儀熙事告成蕃禧茂介臣心常拱北跡尚  
滯南肅肅雖雖莫預臣工之顯相穰穰簡簡第祈福祿  
之來成

謝進讀三朝寶訓徹章轉官表



祖訓是式甫勸誦以終篇臣等何功迺蒙恩而增秩徒  
負因人之愧敢云稽古之榮竊觀上古帝王以來無若  
我朝祖宗之盛三聖相授謨丕顯烈丕承百世莫違軌  
易遵度易則布在方策貽厥子孫聖緒紹休首先取法  
邇英進讀今遂徹章慚無紬繹之勞猥沐褒遷之寵茲  
蓋伏遇皇帝陛下道純德厚日就月將謂監于成憲則  
其永無愆非學于古訓則豈能有獲肆令儒紱入侍經  
帷數陳三十卷之格言紹復億萬年之洪業適華編之



方竟疏渙渥以均頒臣等敢不拜手承休銘心圖報告  
于內順于外當毋忘啓沃之忠尊所聞行所知願益進  
光明之學

復盱眙泗州賀表

敵王所愾甫聞武烈之揚因壘而降已見齊疆之復邊  
烽寢息國勢愈尊竊以天道好還方篤皇家之眷王者  
無外當恢輿地之圖念彼不恭侵予王略爰整其旅已  
收八戰八克之功若往而征必獲萬衆萬全之利憫其



歸附貸彼誅夷額額蔡城既復修其職貢茫茫禹迹佇  
混一於車書茲蓋恭遇皇帝陛下神聖武文剛明果斷  
屈此羣醜銷渤海之弄兵殲厥渠魁措山陽於奠枕餘  
威所暨故壤復還端由妙算之淵深遂致膚功之日奏  
臣側聆盛事倍激懽悰淮夷來求莫預名虎王休之對  
青徐底定當賡韓公聖德之詩

復盱眙泗州賀皇太后表

如月之恒咸仰並明之德普天之下自無不服之思舊



境復還慈顏有喜恭惟皇太后陛下含洪光大富壽康寧至哉坤元夙贊純乾之運施于方外咸瞻太極之尊無疆惟休俾昌而熾遂使齊疆之舊重歸周版之新臣傾聽捷音敢伸善頌方千里者九盡入輿圖呼萬歲者三願同嵩嶽

潮州到任謝表

郎開五稔深愧空餐海嶠一麾誤膺隆委已涓剛而視事敬宣化以承流伏念臣鉛槧寒生蘼蕪太學決科發



策濫居龜列之前束帶立朝猥廁駕行之末九叨清選  
兩攝銓曹揣分已踰抗章荐請遂沐允俞俾循更迭畀  
潮陽之名郡實閩部之隣封便道之官遂上冢過家之  
願褰帷問俗無帶牛佩犢之風凡此曲成過於自擇茲  
蓋恭遇皇帝陛下達聰明目任賢使能更治民以考功  
每重藩維之寄不泄邇而忘遠欲如畿甸之中遂令蓬  
省之腐儒亦預竹符之遴選臣敢不奉法循理戢吏愛  
民問疾苦於上聞期進昌黎之表率俊秀而就學更遵



文惠之規冀著微勞仰酬洪造

代謝到任表

需次京師荐拜趣行之命承流鄞水猥分共理之符已見吏民具宣德意伏念臣玷名屬籍廁跡官聯別駕題輿愧乏康沂之詠朱轡皂蓋濫叨守土之榮載惟臨汀素稱僻壤土田磽薄窮簷素乏於恃儲鄰境繹騷連歲已疲於供億雖幸息寇攘之警尚有資牧養之謀夫豈妄庸足膺任使茲蓋恭遇皇帝陛下天臨萬宇器使羣



工務更化以勵精不泄邇而忘遠知臣當佐郡政必能  
宣守土之勞謂臣辱在宗盟或可任維城之寄遂疏渙  
渥俾效寸長臣敢不祇奉邦條恪遵侯度郡國之治先  
惠養當戒煩苛田里之民無歎愁庶幾報稱

謝賜宸翰表

皇祖有訓甫誦讀以終篇雲漢為章已昭回而飾物過  
蒙數錫允謂殊榮竊觀歷代以來無若本朝之盛有典  
有則貽厥子孫易繼易遵昭然龜鑑肇啓億萬年之業



具存三千卷之書聖緒紹休首先取法爾英勸誦今遂  
徹章式彰典學之始終自愧無功於啓沃豈期宸翰俯  
賁公蹤茲蓋恭遇皇帝陛下齊聖廣淵剛健中正朝聽  
夕訪惟思謨烈之承日就月將期致緝熙之益示宗儒  
而重道援肆筆以成書臣敢不拭目諦觀肅躬跪受以  
報其上敢忘歸美之忱曰思無邪當體賜詩之意臣無  
任感天荷聖激切屏營之至謹奉表稱謝以聞臣某惶  
懼惶懼頓首頓首謹言



謝除授試禮部尚書仍賜衣帶鞍馬表

秩宗典禮濫叨遷擢之榮中宸疏恩重拜服乘之賜曳  
婁弗稱駕鈍奚堪臣某惶懼惶懼頓首頓首伏念臣才  
不踰人學未聞道振衣造闕初微左右之先容束帶立  
朝敢替始終之一節誤蒙簡眷荐玷清華甫進長於兵  
曹復易司於宗伯改為改造既頒在笥之珍載馳載驅  
復被效牽之貺僥踰已甚報稱謂何茲蓋伏遇皇帝陛  
下卑服即功馭臣以柄慶賞以勸善靡忘敝袴之藏名



器不假人尤謹繁纓之錫豈期菲質猥辱殊榮臣敢不  
祇佩恩輝益加鞭策陳力就列愧無汗馬之勞補過盡  
忠冀免維鵜之刺

代期集所謝賜御詩表

玉陛臚傳已被龍光之煥寶奎寵錫復窺鳳翥之章撫  
己凌兢拜恩隆厚竊惟歷代設科之制莫如本朝待士  
之隆淳化首賜於御箴天聖載頒於大學於皇今日聿  
舉舊章豈徒昭藻麗之工蓋欲寓作成之意伏念臣等



躬承清問旅進大廷剴切而當帝心慙無高論昭回而  
倬雲漢遽拜宸章茲蓋恭遇皇帝陛下更化勵精求賢  
用吉官其始也欲示激昂詩以寵之俾增渙渥第愧布  
韋之陋豈堪黼黻之華臣敢不佩服聖言砥礪臣節以  
承休德永懷精白之思乃賡載歌願述明良之盛

祝文

改元奏告天地社稷太乙宮祝文

伏以已安已治咸稱嘉祐之時丕顯丕承無若淳熙之



盛仰承祖武庸易歲元敢伸昭告之恭冀獲無疆之福

改元奏告宗廟祝文

伏以尊祖敬宗期修洪業體元履正庸易休名以奄旬於嘉師冀緝熙於純嘏願垂昭鑒永底丕平

改元奏告諸陵祝文

理內御外期集大勲建號紀元盡遵先烈爰取嘉祐盈成之盛復參淳熙振起之規尚冀鑒臨永垂孚佑

諸陵補種祝文



有翼有嚴盡謹寢園之奉既種既戒冀增林下之蕃庸  
表孝思敢申昭告

太廟祖宗帝后神主權奉安祝文

伏以謹涓剛辰興工繕治別嚴齋宇暫安睟容俟匠事  
之告成奉真游而來復

告遷祖宗帝后還殿祝文

比嚴別宇暫安睟容茲繕治之告成奉神靈而來復用  
申昭告仰冀鑒臨



顯宮皇后下宮修換了畢告遷神御還殿祝文  
顯宮攢殿已畢繕修爰擇剛辰奉還神御敢伸薦告仰  
冀鑒臨

立春祀五福太乙十神祝文

立春之日實開一歲之端受祿于天尚冀十神之祐仰  
騰碧篆俯控丹衷伏願仙馭下臨高真洞鑒使壽使富  
更多男子之祥俾熾俾昌益羨泰元之筮

孟春朝獻祝文



伏願受祉既多降年有永自今以始舉無敵國外患之虞遙求厥寧復見嘉祐淳熙之盛

伏願自天錫羨如川方增使壽使富而多男克昌厥後宜民宜人而受祿永孚于休

立夏祀五福太乙十神祝文

四月維夏孟嚴太乙之祠五福錫民敢覲明神之佑仰騰碧篆俯控丹衷伏願萬國咸寧復見昇平之象三時不害用成豐稔之祥



嶽廟真聖諸廟祝文

惟時季秋萬寶告成民安田里枹鼓不驚何以臻茲繫神之靈報有彝典其敢不誠尚祈終賜永庇羣生

嶽廟聖帝祝文

岱宗四嶽春首四時祀有彝典其敢不祗雨暘時若黍稷咸宜帝其念哉

告謝嶽瀆祝文

涓選吉辰稱秩宗祀既獲顧歆之况敢修望秩之儀仰



冀洪休永扶景祚

謁諸廟祝文

某濫叨郡寄以視事之三日祇見于廟惟神聰明正直  
作善降祥某敢不奉法循理謹終如始以祈神之休自  
信如此尚其鑒之

又

凡有功於民載在祀典者必於春致享焉茲舊制也矧  
今物無疵癘家用平康皆神之休敢不謁祠下以祈終



庇尚其鑒之

又

聰明正直保佑一方物無疵癘家用平康仲春藏祀敢  
替舊章尚祈終惠錫以豐穰

又

某猥以疎庸假守茲土實與有神分職幽明凡治獄宣  
教某不敢不任其責至於雨暘時若年穀順成則惟神  
是望視事三日謹祗謁於祠下



廣德軍廣惠廟祈雨祝文

歷時不雨屢致禱祈三日為霖冀垂感格雖間蒙於潤  
澤猶未決於焦枯敬遣廷紳祇謁祠宇仰騰碧篆俯控  
丹衷正直聰明願鑒忱恂之懇霑足優渥用成豐稔之  
祥

天目山龍井大雄山祈雨祝文

伏以六月不雨豈勝旱暵之虞三日為霖願沐霑濡之  
賜雖屢伸於祈禱猶未遂於感通爰遣廷紳偏走郡望



嗟鬱攸為沴民生已困於煎熬苟膏澤愆期歲事必遭  
於荒歉願垂陰相俯鑒衷忱龍翔而景雲興沛為甘霖  
穀熟而人民育迄用康年

龍井迎水祈雨祝文

七月不雨深懷卒歲之憂三日為霖冀遂有秋之望敬  
憑道侶往叩靈湫勺水以迎還竭寸衷而致禱願垂  
孚佑亟賜感通龍翔而雲霧興大沛滂沱之澤穀熟而  
人民育永消旱暵之虞



後庵祈雨祝文

荷鍤如雲方興農事覆手為雨全賴佛慈矧偏壘之並  
山乏巨川之瀦水膏澤不下豐年曷期謹騰寶篆之香  
仰干大覺願灑淨瓶之水散作甘霖

龍井請水祝文

龍潛於淵孰窮變化天久不雨敢後禱祈矧外臺方切  
於咨諏而靈跡欲求於顯著願因亢旱大需甘霖既足  
既霑益廣及民之利至三至再即膺封爵之榮已削牘



金匱要略卷九  
以敷陳冀垂休而昭鑒

韓文公祝文

惟公文起八代之衰道濟天下之溺屈臨此邦猶不鄙  
夷其民而訓迪之遂使遐陬同風鄒魯某被命此來敢  
不仰遵懿範一意作成以期文物彬彬之盛茲因祇謁  
敢控衷忱

祭告土地祝文

眷惟廟祧之所厥有里域之神屬茲繕修實資呵護庀



工云始前告是宜

後庵祈晴祝文

大田多稼將遂有秋驟雨終朝浸成積潦恐三農之缺  
望仰二佛以投誠伏願以慈悲心出方便力現眉端一  
毫之相盡掃妖雲使鄞江千里之民同瞻佛日

又

三日為霖雖免旱乾之慮大田多稼適當成熟之時恐  
或浸淫必妨刈獲願軫慈悲之念曲垂覆護之私迄用



康年母以陰而以雨亦有高廩庶如擲以如墉

又

零雨其濛恐妨刈穫先事而慮盍罄禱祈謹載啓於法  
筵願曲垂於終惠舉頭見日咸欣赫赫之光納稼如雲  
俾遂穰穰之慶

獲感應奏謝祝文

齋心滌慮屢致禱祈轉陰為晴已蒙應格幸免浸淫之  
患敢稽報謝之恭所欲必從行遂千倉萬箱之積自今



以始更慶五風十雨之祥







欽定四庫全書

東澗集卷十

宋 許應龍 撰

策問

御試文舉策問

朕以菲德紹休聖緒粵自更化以來總攬權綱屬精思  
治于今六稔莫覩成效外則多壘之未平內則羣生之  
寡遂豈朕之政有失而行有過歟抑規模之未定而議  
論之徒詳歟夫廣覽兼聽固欲通羣下之情而甲可乙



否若何決擇旁搜博采固欲獲實才之用而讎僞假真  
若何考察官吏非不戒飭而苟且如故法令非不申嚴  
而奉行不度士氣當振何以為風勵之方民俗未厚何  
以為感化之術蠲免租賦則羣計必乏賑卹流移則廩  
給難繼楮幣折閱而秤提無策國用窘匱而科撥無已  
凡此十事皆當今之急務詎可不慮以不圖或欲循名  
責實或欲信賞必罰或欲久任而責成推而行之不知  
何者為先歟然此皆治內也而治外尤不容緩權時施



宜雖欲息民思患預防盍先強本守江淮而防海道復  
侵疆而修關隘求將略而擇邊守綏御歸附之衆招集  
奔潰之卒置游擊以為應援改城壁以據險要此皆關  
於備禦之大計伊欲處置得宜夫豈無策而或者乃曰  
地利不如人和用儒則無敵於天下豈衆心成城而道  
德之威自能成安強歟夫毋恃其不來恃吾有以待之  
所謂待之者又果何術歟昔宣王任賢使能內修政事  
而中興之功不旋踵而至豈天下無難為之事特患夫



金匱要略卷十  
無必為之志歟子大夫通達國體必有切時之論詳著  
於篇朕將親覽焉

召試館職策問

問當天下多事之秋而欲興起治功者其大要有四曰  
國論曰人才曰民心曰軍政蓋國論不定則無以為立  
治之規人才不擇則無以為濟時之用民心不固軍政  
不修則何以理內而禦外哉今之國論何如也言戰者  
則曰整師修戎可以挫敵鋒而強國勢而和豈足恃言



守者則曰深溝固壘可以捍外侮而安邊境而戰未可  
輕言和者則曰與其驅民於鋒鏑而勝負未可知孰若  
結好以金繒而戰爭為可息而或者又曰和雖不足恃  
可以款敵而為備禦之圖戰固不可輕然或遭侵擾必  
不免兵力之接又安能自守耶異論迭起規模不定其  
將何所適從與今之人才何如也靜重者或譏其緘默  
論辯者或指為沽激夫無所可否固無益於成敗若不  
激不隨則似是而實非者也以訐為直固未免於矯亢



而盡言無隱則又若同而實異者也使功不如使過以  
其必能立功以自贖也然奔軍之將不可以語勇其果  
足使乎才勝德為小人以其恃才而妄作也然非才不  
足以辦天下之事其果可棄乎知人則哲自古所難又  
將何以處此歟民心不可以不結今日賑流移之民恤  
焚毀之家固足以示德意矣然恐小惠之未孚減斛面  
之征蠲荒旱之賦亦足以寬民力矣復慮郡計之不給  
秤提楮幣而奉行太亟反至於折閱糾集保伍而處置



失宜或至於紛撓軍政不可以不修今日招募雖多徒耗廩稍而脆弱難用宣訓練之不精耶抑紀律之不嚴耶官資多轉而兵不激勵遇敵輒退豈賞罰之不明耶抑號令之未孚耶以民兵而補官軍之闕額就使戍邊而口券之費可省不知其果樂從乎募民船以防江海之要衝分番更代而舟師之勢益壯不知其果無擾乎夫國論明則人才皆為吾用既為吾用則結民心修軍政當有任其責者何患治功之不立哉然天下無不可



為之事特患乎人主無必為之志今勵精思治廣覽兼聽不為不勤而悠悠歲月未覩成效豈徇名失實而是非之未明耶抑或惑於羣議而施行之不力耶作而新之必有至當之論悉著於篇以備上之采擇

問守邊備塞當世之急務也築城壁固關隘修器械明斥候固不容緩乃若極邊之郡守沿邊之民兵尤有關於捍禦之計可不思所以區處之方且極邊之郡與敵對境使為守者資兼文武固能隨機而應變若素不知



兵或遇警急豈不倉皇而退遁故邇日多用武臣豈非  
以其勇於攻戰足以當敵人之鋒耶第民事或非素習  
儻以馭軍之法施之治民豈不為民之病昔李漢超守  
關南能禦契丹之悍郭進守西山能備并人之寇則任  
武臣以守邊郡乃已然之明驗也然侵掠之罪不法之  
訴當時俱不能免此又不容不慮母亦付郡事於倖貳  
而使之不得專焉第兵民之事既分守倖之權相敵施  
行之間寧免扞格恐因爭以召釁其將何以處此沿邊



之民習於鞍馬嫻於擊刺因而用之豈不足為官軍之助然官軍有月廩有口券至於臨敵猶逡巡而不進為民兵者自耕自食乃欲拘以團結豈能保其無擾驅之鋒鏑豈能責其用命然李抱真為懷澤留後三丁擇一蠲其徭租給其弓矢三年皆為雄邊子弟此又已試之成效也豈今日不可行乎而或者猶慮夫出戰則民兵當其鋒論功則官軍攘其賞又慮夫踐蹂之境田萊多荒廩食不繼而官又從而黠集恐非所樂尚何望其協



心以捍禦乎又將何以處此夫邊郡屬於制帥苟旌別  
淑慝加以勸懲孰不奉法而循理然拘以文法恐非所  
以待豪傑毋亦錄其功而略其過可乎筦權貿易悉以  
與之使之募驍勇以為爪牙而許其便宜從事此乃待  
邊郡之法不知果可行否夫沿邊之民室廬妻子皆欲  
自保而官軍出戍惟欲思歸若給以糧食而俾之守禦  
必皆盡力又擇其願為兵者填刺官軍之闕額就使屯  
戍不惟免更代之勞又復省生券之費不知果可行否



夫識時務在俊傑必有確論其悉陳之以備上之采擇問西掖演綸北門視草所以賁飾皇猷而黼黻政化非學問該洽詞章宏麗不足以膺是選此詞科之所由設也故必試之以駢儷律之以程度參之以記問合則取否則黜而真才實能皆可網羅收拾以為異日之用然唐人有言食垂餌者皆小魚就科目者皆小藝既曰宏博則豈容以是求之然唐世之設是科乃得人為盛不惟詞章典麗蔚有古風而操守端正者有人仁義論諫



者有人望冠一時者又有人則是科之設豈不足以得  
異能哉然學如退之文如退之乃屢試而不中又何歟  
愈謂所試之文類於俳優使屈原孟軻與今之善進取  
者競於蒙昧之中必知其辱焉愈之為是言也其亦有  
激而云乎抑當時之預選者果未有可觀歟愈雖不預  
此選而鋪張揚厲之文乃編之詩書而無愧是則取人  
之道似未可以科目拘也恭惟國朝尤重是選或分二  
日而試以四題或分三日而試以六題多或取於十人



少或取於二人或處以館職或畀以學官取之既精擢之復亟而名公鉅卿多繇此出今日是科非不設而應者少命題非甚艱而中程者曠數舉而未聞焉豈人才獨盛於昔而嗇於今耶抑程度既拘而才識傑異者不肯屑屑以求合耶取之者既艱習之者必怠繼是益乏人焉則又不容不慮也或者欲寬其制謂無掩其所不備惟較其詞藻之工拙庶幾應之者多而取之者易或又謂以宏博設科而不責其記問則人人皆能又非所



以寵傑異之才劑量輕重其將何適而可昔楊龜山謂  
宏詞之試乃以文學自售古人得已似不如此使士夫  
皆以是為戒則是科豈不為虛設哉不然其必有說也  
願併陳之以祛所惑

武學公試策問

問文事必有武備五材誰能去兵然兵凶器戰危事一勝  
一負強弱係焉故為國者莫難於擇將而為將者尤莫  
難於用兵苟無其法則何以先為不可勝而待敵之可



勝是則六韜三略與夫孫吳等書豈非兵家之龜鑑乎  
用之則勝違之則敗斷斷乎其不可易也然歷觀史冊  
乃有取舍不同成敗變異又不能無疑焉教得其道士  
乃可用固也乃有非素拊循之士而能用以克敵何歟  
法令不明百萬何益固也乃有行無部曲未嘗遇害又  
何歟十則圍之五則攻之此量敵而進之意也或者乃  
以五千當百萬之師得無衆寡之不敵乎而淝水之戰  
乃以是而勝右背山陵前左水澤此審勢而陣之法也



或者乃使萬人為背水之陣無乃捨安而就危乎而井陘之戰因此而捷四勝者弊五勝者禍是兵不貴於常勝也而七擊匈奴斬獲甚衆者卒能收河南而置朔方歸師勿遏窮寇勿追懼激之以生變也而輕騎夜追至二百餘里者乃能走單于而獲首鹵此皆不合兵書而自有以取勝豈奇正相生如循環之無端而不可窮耶抑隨機應變自有妙算不容膠柱而調瑟耶若然則兵書所載亦未可執之以為據也然謂其果不足據歟則



張良得一編已能決千里之勝充國學兵法又能成降  
羌之功謂其果不可舍歟則趙括讀父書何不免長平  
之敗去病不學古兵法何亦成封狼居胥之勲此尤所  
未喻者然猶有可諉至於兵書所言乃有自相矛盾者  
又豈容無辨既曰攻其無備出其不意又曰待其成列  
而始鼓既曰啓於元龜吉而後舉又曰不卜筮而事吉  
既謂詭道矣復謂理之以義動之以禮既云使貪矣復  
云內貪外廉是謂盜端若是之類不一而止不知何者



為當夫自黃帝以至於漢言兵者一百八十二家今存  
於世可以為兵家軌範者蓋亦無幾而其說猶未免有  
疑焉諸君講學待問其必有折衷之論願詳陳之以祛  
所惑

問世之學為武者視書而考兵謀案圖而習陣法知此  
而已矣且兵之奇變左計右數出於臨時則書固有不  
能盡者方此之時不知圓機以接奇變則昔之所學者  
是古人之糟粕已尚安足以赴用哉今將試之以兵術



而必使得書之所以言嘗之以陣法而必使得圖之所  
以教以稱上意則其為要如何其凡目安在其書與圖  
孰得孰失幸相為言之

太學私試策問

問郡守民之師帥也師帥賢則政平而田里無愁嘆之  
聲不賢則公私煩擾而穉耆失宅生之望有志於治者  
其可不知所擇乎然知人之道自昔所難不觀其貌則  
無以知其精力之盛衰不察以言則無以占其才智之



優劣是必召見於殿陛之間諮訪於論奏之頃則賢否  
真偽庶不能為吾之惑矣漢之宣帝每拜守相輒親見  
問考其所行以質其言唐之元宗刺史陞辭皆令詣側  
門以俟進止宜若可以察人之能否矣意一時吏治皆  
如黃霸之守潁川真卿之守平原然八萬餘口猶得以  
肆其偽增之欺二十四年猶不能堅為守禦之計豈二  
君識見之未精耶抑臨遣之際徒能察其言貌而名實  
不相應者未容以遽知耶恭惟孝宗皇帝留意吏治郡



守陞辭必加考察或以失儀而罷免或以稱旨而擢用或以疾病投置閑散故循良之吏布滿郡國有以成乾道淳熙之治今日仰遵成憲凡未經陞對及已對在四載之外者皆令申審而邇臣復慮積官至守早達者罕精神識慮四年之久日異而歲不同恐有癘老疾病不任事之弊欲凡到闕者悉俾奏事睿旨諭之此誠為官擇人之要術也或者猶謂年餘七十者猶能息渤海之盜多病不出者亦能致東海之治則老疾者似未可以



盡棄也然一見之頃未覩施設安保其尚可用耶議論  
持平者出守北地乃不免治郡不進之責辨論以義理  
之文者使守會稽乃莫逃久不聞問之譴則論奏之間  
亦未可以盡信也然使其言果有可聽又安能料其他  
日之不相副耶斟酌而區處之殆將何術而可願詳陳  
之有司將以獻焉

宗學私試策問

問得賢立邦家之基任賢享天下之福人主出而有為



於天下其可不以是為先乎然一人之見有限四方之才無窮苟不采之公言求之薦舉則真才實能果何自而上達哉故唐虞之時必曰疇咨僉曰伯禹則使宅百揆僉曰伯夷則使作秩宗益作朕虞垂作共工亦皆於僉言之中求之薦舉若是固足以得人矣然登庸之任豈囂訟者之所宜處而放齊舉之子采之若豈象恭者之所能任而驩兜舉之湯湯洪水豈方命圯族者所能治而四岳舉之夫明明在上穆穆在下賢否固易知也



而所舉之人未免若是何耶曰吁曰咈固俱知其不可  
矣而績用弗成者猶待於試而後已何耶豈知人之道  
固自古之所難歟夫采之薦舉猶未足信則用人之道  
又將何所據歟迨至後世知人善任莫若高祖求文武  
如不及莫若武帝蕭何薦韓信則用之魏無知薦陳平  
則用之或以其善用兵或以其智有餘信而任之宜也  
然周昌白見四人既知其不能為將矣而封各千戶是  
果何意豈創業之初急於用人不考其素不求其全耶



不進賢者退不察廉者免蓋恐實行之士壅於上聞而  
搜求惟患其不廣也然薦人起家至二千石復不免君  
除吏盡未之責何耶豈招賢乃人主之柄而人臣非所  
當專耶不然其必有說也恭惟主上以上聖之資膺維  
新之命勵精思治側席求賢乃者渙發綸言播告中外  
使舉賢能才識以備選用猗與休哉雖禹之勤求賢士  
湯之立賢無方何以過此然薦牘交馳其比如櫛將悉  
加旌擢則清資華秩固不能徧將拔尤取穎則名美實



乖者亦未易辨以薦舉之多者而用之歟則頭鑽肘刺  
巧於經營者或得以售其欺即達官之所薦者而用之  
與然為官擇人惟才是適又不當以所主之人為輕重  
也況夫親故之夤緣勢要之囑託又有所當察者若所  
用非所舉所舉未必用則詔旨丁寧又豈直為觀美哉  
今欲在朝無倖位在野無遺賢將何術而可願聞至當  
之論有司將以獻焉

省試策問



問有循吏有能吏奉法循理愛民厚俗者循吏也治劇  
剽繁發姦擿伏者能吏也然優游和緩者多悶悶之政  
振厲奮發者有赫赫之聲能者固可與集事矣乃若漢  
文之世吏皆廉平而黎民至於醇厚武帝之吏罕以治  
化稱而海內謂之虛耗則循者又豈不足與共治哉宣  
帝留意吏治黃霸龔遂朱邑之徒既以循而用廣漢翁  
歸張敞之徒復以能而進是以吏稱其職民安其業然  
賊殺不辜者復拜刺史偽增戶口者亦蒙顯賞不幾於



濫乎豈使功不如使過而賞疑從予固不害為近厚耶  
夫曰循曰能皆有可紀史臣乃獨傳循吏而不及能吏  
豈循吏以德能吏以才才固非德之比耶今日循吏雖  
不乏人而以能名者比比皆是豈循吏不矜伐百姓無  
稱而多多益辦者每易於自見耶但用人之道不可偏  
尚事功之未集有才者固所當用至於化民成俗厚下  
立本所以壽國家之脈者又豈才勝德者所能為哉然  
寬厚有餘者隣於委靡每為人所厭振厲敢為者事罔



不辦多為人所喜而識者之論則曰委靡之弊止於廢事趣辦之過必至病民一或不審則相師成風其害有不可勝言者今九重厲精思治為官擇人用循吏以惠民而不至廢事用能吏以辦事而不至病民其將何術而可諸君通達國體豈無至當之論願詳陳之有司將以獻焉

問當理內御外之日思患而豫防隨機而應變固足以為彊本折衝之計然將不擇兵不練功不賞亦不能以



集事夫安邊境立功名在於良將是將不容於不擇也而敗諸峭者乃能決焚舟之勝少不更事者亦能奏泚水之捷豈能否難以逆料成敗不可論人未可預擇於其初必要終而後見耶士不素厲難使死敵是兵不容於不練也而非素拊循之士反能成背水之功無部曲行陣者亦能使匈奴之畏豈兵無強弱惟顧所用亦不在於蒐練之有素將苟得人自可以計而取勝耶慶賞信必則有功者勸是有功不可以不賞也然黥布一見



即王淮南趙壯士一見封各千戶初無尺寸之勞而遽  
獲不次之賞若幾於濫矣而當時之臣顧稱其善將將  
豈駕馭豪傑當有操縱而或輕或重固不可以一律拘  
耶邇者強寇憑陵疆場不靜所恃以備守而驅攘者惟  
諸將是賴乃有望風畏懾莫能固守者其勢亦廩廩矣  
今安豐之戰既勝齊安之捷存聞而夔門亦復其舊聲  
勢震張中外胥懾非將勇而兵銳何以收功若是其速  
論功行賞曾不踰時固足以為將士之勸矣使沿邊之



地將皆有謀兵俱用命而慶賞所加各當其功則感激  
思奮戰必勝攻必取尚奚外患之足慮哉奈何勇怯之  
無別差陞之不公以養為安以貪進為能其間固有  
驍雄無敵沈鷺善謀者亦不能以自見教閱之不嚴激  
厲之無術無事則驕蹇而難制有警則退縮而不前其  
間固有精於技擊奮不顧身者亦莫能以自效推原其  
故豈非爵賞間猶有所當察者乎有功者未必盡錄則  
宣力者怠無功者反先獲賞則當得者怨或經營求據



以為就試之階或泛濫妄申以徇親故之求為弊若此  
雖恩賞日增果足以示激厲乎比者詔旨丁寧今薦舉  
曉暢兵機俾招足闕額教閱而誕謾欺罔者戒以毋干  
邦憲是固欲擇將練兵而革冒濫之弊也然人情多私  
未必實應積弊滋久未易遽革作而新之夫豈無術而  
或者乃曰將固當擇若考其素求其全恐未易得用人  
之智去其詐用人之勇去其貪而使功不如使過亦可  
以責其後效不知其說果可行否臨邊之民熟於戰鬪



招使戍守必能遇敵不懼而或慮其未必樂從拘繫之  
囚亡賴輕生刺充敢勇必能摧鋒陷陣而或恐其難御  
不知何以處此至若功賞之申責之主帥而不實者責  
罰則孰敢為欺然六級之差繩之以法而或以罰太重  
議之偽冒者窮究追毀而為之營求者罰亦併及則必  
知所警然賞疑從予所以廣恩若考覈太嚴恐當得者  
亦因而沮遏此又不可不慮也諸君通達國體必有至  
當可行之策願詳陳之有司將以獻焉



問國於天地必有與立所恃以憑藉扶持者固不一而止而大要則曰國論曰人才曰民心蓋國論者政令之所從始人才者事功之所由立民心者又有關於理亂安危之機也夫執狐疑之心者來讒賊之口持不斷之意者開羣枉之門則國論其可以不定乎定則不搖於浮議而無輕變之患然入粟之議反覆論難而不決屯田之議前後依違而不定而識者乃謂其議盡天下之心何耶德勝才為君子才勝德為小人則人才其可以



不辯乎辯則賢否不容於並進然跖弛之士能立功名  
尾生孝已之行無益於勝負則才勝德者似亦未可以  
輕棄也民心無常惟惠之懷大賚四海萬姓悅服是民  
心不可以不結也然濟人於溱洧者乃譏其不知為政  
遺衣遺食者或謂其所惠之未廣豈善政善教足以得  
民而不徧愛者初無損聖人之仁歟恭惟主上下詔求  
言和顏受諫或令集議或令看詳固欲國論之一定也  
為官擇人求賢用吉而曉兵機通財計與夫堪充將才



者又令薦舉固欲人才之不遺也發粟散財寬租已責而蹂踐之區流離之氓復勞來而安集之又所以固結斯民之心也然戰守之議彼此異見秤提之令前後屢更履畝未幾慮其紛擾而隨罷混試方行恐其叢雜而復分議論若不一矣豈因時施宜固不容於固執耶然昔人謂先定規模而後從事又謂天下之事惟審具是定而不移乃可成務以是而主國論不知果可以一定而不易乎閤論高談者若善謀輕舉妄動者若敢為露



才揚已者若多多而益辦視事遷就者若隨機而應變  
其真偽固未易辨也而人才因事而後見亦安可遽疑  
而不之用耶然論辯官才者必論定然後官而知人之  
道亦在於聽其言而觀其行以是說而選任果可以得  
人否乎斛面方減而挨究復行逋負方蠲而催督如故  
貧困當恤而廩給難繼告戒非不切而奉行不虔是民  
瘼猶未蘇也然得其心有道惟在於所欲與聚所惡勿  
施而仁義公恕以統天下自可使無異志即是理而行



之果可以得民心否乎然是三者雖若不同而脈絡未嘗不相通國論定則無好尚之偏而有才者皆可以自見人才既有以自見則凡所施設必合於人心而孰不愛戴或者又謂天下無難為之事惟患乎無可用之才苟衆賢和於朝則同聲相應國論不期而自定合三者而言之又不知何者為先歟夫識時務在俊傑諸君博古通今其必有以處此詳著於篇以備上之采擇



欽定四庫全書

集部

東澗集卷十一至十四

詳校官庶吉士臣瑚圖禮

主事臣呂雲棟覆勘

謄錄監生臣張曾壇



欽定四庫全書

東澗集卷十一

宋 許應龍 撰

啟

賀丞相除太傅啟

渙奉制函晉躋帝傳壽登七袞實人間希有之齡位列三公示聖上殊常之眷福祿俱備中外均懽恭惟太傅樞使丞相國公社稷宗臣股肱重寄輔贊已逾於二紀忠勤靡替於一心方事變之沓來悉皆異議及廟謨之



密運迄奏膚功內焉庶政之惟和外則侵疆之復舊天  
佑賢佐俾壽而昌號發王庭以彰有德將擢寘維垣之  
峻姑勉從遜牘之謙雖亞上公實均一品年方七十已  
先卓傳之除歲有萬千益衍魯公之壽某側聆成命喜  
倍輿情擁帚掃門愧莫接賀賓之武濡毫吮墨當載賡  
聖德之詩

賀薛樞密啟

恭審擢升使領晉長樞庭王言大哉顯奉制麻之寵相



尊等耳榮參台鼎之間郵置初傳中外胥憚恭惟某官  
伊周事業稷契忠嘉久運籌於帷幄之中獨贊化於陶  
鈞之上厥績甚懋何官可酬位特冠於籌帷班志同於  
公衮禮示異數庸昭宸眷之隆民具爾瞻行陟帥垣之  
峻某敢修菲削少控賀忱不進不休屢沐鼎言之推輓  
成終成始尚祈大造之甄陶

賀大諫啟

恭審擢自南床進登東省材御史糾繩轍下久伸三院



之威真諫官獻替殿中獨處七人之首見聞皆聳風采  
益尊恭惟大諫識造高明氣全剛大英姿山立望之儼  
即之溫雅量淵洪澄不清撓不濁久居言路綽著直聲  
志在擊邪如鷹鷂之逐鳥雀事先去甚當豺狼不問狐  
狸邪正洞分紀綱大振彌結知於宸扆遂晉長於諫垣  
進思盡忠不憚青蒲之伏坐而論道即觀黃閣之登某  
濫玷守藩甫諧視篆側聽郵音之播敢伸記室之恭鳳  
凰鳴朝陽咸傾寢謬燕雀賀大厦願托帡幪欣抃殊深



剡裁莫究

賀交代潮守葉奏院啟

維桑與梓夙蒙知遇之隆剖竹分符復托交承之契亟  
仲慶悃仰瀆中涓恭惟某官學廣聞多才宏識遠撓之  
不濁凜萬壑之層冰即之也溫備四時之和氣早躋科  
第藹著聲稱雖周旋於州縣之間每挺持於紳縷之表  
漕臺攄畫工轄程能晉升奏邸之司彌簡凝旒之眷自  
天而下忽膺宸命之頒遵海而南榮任侯藩之寄巾車



脂轄上冢過家式過其行不特見人生之貴所居而治  
又將聞政理之優當與文惠以齊驅罔俾昌黎之專美  
徒得君重雖足為遠嶠之光以我公歸行進陟甘泉之  
從某熊轡久玷鼠技已窮聞行李之來云胡不喜庶及  
爪而代薄言還歸深懷揚粃之慙尚冀匿瑕之賜會言  
近止豈惟叙鄰里之歡適我願兮當永結子孫之好

賀尚書啟

月正元日適鳳歷之更新天相文昌宜鴻休之茂介僭



仲慶悃仰瀆記曹恭惟某官望冠羣公位隆八座撓之  
不濁凜萬壑之層冰即之也溫備四時之和氣三陽交  
泰百祿是適春見曰朝方聽履於星辰之上帝曰咨汝  
俾運籌於帷幄之中某濫剖竹符欣逢穀旦道之云遠  
莫稱栢葉之觴敬不虛拘敢獻椒花之頌

賀丞相啟

一氣回元適三陽之交泰大鈞播物罄萬宇以皆春維  
時上公受天純嘏恭惟某官伊周事業稷契忠嘉一德



享天心孰測化工之妙八荒開壽域豈惟寒谷之回正  
月之吉始和諸福之物畢至未多郭令僅二十四考之  
中書將繼魯公享萬有千歲之眉壽某濫分符竹實出  
甄陶茲逢穀旦之臨盍致椒觴之賀即溫望儼阻陪東  
閣之後塵噓枯吹生敢冀南枝之先暖

賀執政啟

一氣回元適三陽之交泰貳公洪化罄萬宇以皆春謹  
飭慶牋仰塵潭府恭惟某官臯夔事業稷契忠嘉端委



廟堂而為準百僚密贊鴻鈞之播運籌帷幄而決勝千里頓清鴈塞之氛當正月之始和宜諸福之畢至自今以始校二十四考之中書俾熾而昌享萬有千歲之眉

壽

下詞  
同上

賀侍御啟

恭審疏恩北闕正位南床民自不寃方振棘卿之譽人惟求舊復登栢府之雄委寄益隆見聞皆聳恭惟侍御意誠而心正色溫而氣和不倚不流獨厲端方之操可



速可久初無躁競之心惟所守之甚堅故其發也必大  
昨甫登於學省徑分察於臺綱諤諤以昌排公論之所  
不與蹇蹇之故發衆人之所未言宜直上於台躔胡暫  
淹於鄉月然風采素聞於天下孰不具瞻而眷懷尤切  
於宸衷蓋將大用果復青氈之舊益揚白簡之威毋以  
日月為功寧久居於橫榻命之朝夕納誨即進秉於洪  
鈞某濫厠年盟夙蒙德庇喜聽郵音之播亟仲記室之  
恭靈丹就而鷄犬仙雖莫容於攀附大厦成而燕雀賀



願曲賜於帡幪

賀喬參政啟

恭審渙敬宸命擢預政機聖主得賢臣協贊鈞衡之任  
文事有武備復參帷幄之籌郵置初傳紳綏胥慶恭惟  
大參同知相公先生天民先覺名世真儒直哉維清德  
可尊事可法毅然有守中不倚和不流久居言語侍從  
之班每盡獻納論思之益暨登右府益罄忠規格其非  
心首務防微而杜漸引之當道未嘗揚已以取名故言



聽而諫行致君正而國定擢居丞弼庸示眷懷暨予同心允謂精神之契以輔台德即登鼎鼐之司永孚于休自今以始某輒修菲牘庸致賀忱不進不休屢沐鼎言之推輓成終成始尚祈大造之甄陶

賀黃循州啟

虎榜登名嘗接英流之武熊轡假守行依鄰壁之光聆揚旆以鼎來喜盍簪之伊邇敢期謙德先畀華緘恭惟某官發藻儒林蜚英饗舍胸中浩博富牙籤萬軸之書



筆下瀾翻瀉銀河九天之水早策身於名第遂振跡於  
夷塗制錦男邦恢恢餘刃題輿潛邸藉藉休稱謂宜視  
草於北門胡暫分符於南土蓋以凶徒之反側尚費捍  
防資善政以拊循庶能綏定趣戒朱轡而入境即銷赤  
子之弄兵賣劍買牛當繼渤海循良之吏荷囊持橐佇  
歸甘泉侍從之班某敬染魚封庸仲燕賀蒙九里之潤  
願廣推及晉之波介大國之間寧復有奔秦之盜

謝差知潮州啟



代庖郎省慙惕日以罔功假守侯藩忽自天而有命始  
終僥倖進退光榮伏念某植性素昏受材樗散績文種  
學第知兀兀以窮年端行俟時寧敢栖栖而為佞初蔑  
一人之薦引特蒙大造之知憐兩寅周行九叨清選自  
再兼於銓部凡五閱於歲華屈指同寅接踵補外獨未  
親於民事恐莫報於恩私可以去乎遂薦伸於丹悃與  
其退也俾出駕於朱轡距梓里以非遙况瓜期之促近  
喜有上冢過家之便益增分符剖竹之輝自謀何以過



之始願固不及此茲蓋恭遇丞相精忠貫日盛德格天  
惟幾惟深藏妙用於莫可名言之域能定能應成大功  
於不動聲色之間邊陲雖底於敕寧外郡尤資於惠養  
謂太守乃吏民之本要在得人庶遐陬如畿甸之中悉  
皆蒙福豈期揀擇猥及疎庸某敢不節用愛人奉法循  
理首戒貪泉之酌期觀越石之清治渤海而選用賢良  
慙非龔遂至潮陽而詢問疾苦當效韓公

代賀禮侍除吏部侍郎啟



渙膺宸命晉貳天官禮以導中樂以導和已播直清之  
譽賢者在位能者在職更資銓選之公睿眷彌深師言  
允穆恭惟某官才姿超軼器局恢闊諸老猶未能言獨  
殫謹論天子擢為第一俯壓羣英徑躋鴛鴦之聯不假  
虬螭之助書林冊府徧歷清華宰掾郎曹迭更委寄纂  
修史館羽翼儲宮已為儒者之極榮尤躡甘泉之法從  
代言西掖秩禮南宮俊髦欣典舉之公科目慶得人之  
盛載頒渙號俾貳選曹坐廟朝而進百官此其漸耳理



陰陽而遂萬物行將見之某自愧謏才濫司偏壘側聽  
郵音之播阻修賓祀之恭靈丹就而鷄犬仙雖莫容於  
攀附大厦成而燕雀賀願曲賜於悒悒

代賀殿院除起居郎兼戶部侍郎啟

榮膺鳳詔進立螭坳執法殿中方喜臺綱之肅秉筆柱  
下更參民部之權眷倚彌深見聞皆聳恭惟某官清風  
立懦烈日爭嚴詞章輝華如引星辰而上議論磊落若  
決江河之流自陟要津益騰廣譽方升華於六察復進



職於副端卓然不羣猶鷹鷂之逐鳥雀去其太甚當豺  
狼不問狐狸奉簡以聞垂紳皆震將倚論思之益遂分  
記注之司兼貳板曹進聯法從持橐簪筆實為大用之  
階當軸秉鈞行副具瞻之望某仰聆成命俯激懼悚阻  
展拜於賓墀輒抒誠於記史夔龍接武益增朝列之輝  
燕雀何知第切履成之賀

代賀察院啟

渙奉十行晉登六察均其稍食方參楓陛之班聯簡在



帝心俾正栢臺之綱紀傳聞所逮欣抃惟均恭惟某官  
毓德端方受才卓越登會稽探禹穴發為翰墨之工指  
崑崙薄蓬萊迴立風塵之表儒林挺秀士萼交輝早擢  
第于太常旋馳聲於宦路牛刀小試游刃恢恢鶚薦上  
騰諸公衮衮進興百司之庠祿實階大用之權輿風度  
能若九齡乎果被凝旒之眷朝廷誰踰仲卿者徑膺冠  
豸之除共篋設施一新聞見已聳橫秋之鵬鶚豈容當  
道之豺狼毋以日月為功亶為峻擢命之朝夕納誨行



副具瞻某自愧謏才濫司偏壘側聽邦音之播阻修賓  
祀之恭鳳凰之鳴朝陽咸慶風采燕雀之賀大厦願託  
帡幪

代賀帥冬至啟

黃鐘倡六律應緹室以飛灰太極統三微謹清臺而測  
景鼎來休祉萃聚帥垣恭惟某官望重文昌任隆方伯  
清標絕俗凜然萬壑之層冰善政得民散作八州之和  
氣候式逢於剛長吉宜叶於彙征舒柳放梅已報陽春



之消息秉鈞當軸即觀揆路之登庸某濫佐藩條阻趨  
賓廡不遠而復已占夫子七日之爻俾壽而昌敬上僖  
公千歲之頌

代賀職曹官啟

日官推策正月之吉始和君子對時諸福之物畢至敢  
陳儷語上瀆崇臺恭惟某官望重月卿輝騰星使民蘇  
惠澤盡歸春風和氣之中吏戢嚴明如在白日青天之  
下式逢獻歲茂介繁禧某假守斗城阻瞻台耀莫預椒



觴之奉第椿壽之祈

代賀帥啟

履而後泰易推爻象之占正次於王史謹春秋之法敢  
陳頌語仰瀆帥垣恭惟某官八座穹班十連重寄惠施  
閭里助一氣之發生威戢姦倫同羣陰而消伏式臨獻  
歲駢集休祺遵海而南先布青陽之暖自天而下亟膺  
紫詔之溫某仰托洪庥欣逢穀旦蓬萊隔弱水三萬里  
阻展慶於賓墀上古有大椿八千春願默符於壽算



代賀廬陵守啟

命出楓宸符分竹使吏民胥慶競瞻相閱之名流麾幟  
甫臨頓覺侯藩之壯觀方受察於部封之下敢抒誠於  
簡牘之中恭惟某官表表才猷挺挺風烈再世登黃閣  
相輝袞繡於名門一宗無白丁獨占衣冠之盛事即此  
家聲之烜赫固宜禁路以騰驤乃恬退以自將姑逡巡  
而平進盤根錯節小試牛刀別駕題輿暫淹驥足雖效  
績屢徹於丹宸而經綸尚斂於朱轡蓋以廬陵素稱劇



郡蠻獠接境而弄兵時警姦黠喜訟而珥筆風生白粲  
連檣正資斂散青衿比屋尤賴作成苟非明敏之長材  
曷任藩宣之重寄雖一方之幸甚如四海之望何朝廷  
已深知佇頒丹詔公侯必復始行繼青氍某孤陋書生  
艱勤舍選世科濫襲每懷揚糝之慙期成尚賒偶報及  
瓜之訊方奉慈闈而祇役適承畫戟之開藩將斂版以  
鳬趨已拊躬而雀躍紅蓮依綠水愧莫企於前修青蒿  
倚長松願俯垂於巨蔭



謝趙守關陞啟

枯木朽株初乏先容之助青芝赤箭過蒙並蓄之私喜  
公道之復明拊卑躬而增感竊觀今日之薦舉悉由要  
路之吹噓無因而前每遭按劍挾貴而問必辱知音遂  
令單寒寡援之徒無復振厲求伸之望豈期天幸獲遇  
宗英載笑載言屢厭挾書之至或推或輓欲先宣力之  
求倘匪真賢曷膺茲選如某者蠹魚末學斥鷃卑棲無  
所取材偶玷名於黷舍幸而獲選復繼踵於詞科侯泮



濫司官箴確守辱兩章之推薦俄一削之參差欲復青  
檀合干洪造然炙手可熱既無借勢之階搖尾乞憐又  
乏獻諛之態已自歎楚弓之失詎敢期趙璧之歸

謝鄒守關陞啟

處泮宮之冷第采魯芹回寒谷之溫忽逢鄒律仰戴提  
撕之賜亶為特達之知竊惟下吏之進身實賴上官之  
推轂然以薦員之既狹類皆枉道以求伸或托葭莩或  
因桑梓傾心降節拜賈謚之車塵削牘投誠滿何曾之



記室未有不求而得孰謂無因而前幸遇大賢獨明公道觀其所主每惟靜退之求舉爾所知不待懇祈之力豈期疎拙猥預選掄伏念某燈火寒生簪纓未裔託身黌舍荐玷鶚書射策丹墀浪塵龜列不避好為之戒濫叨分教之司範不範模不模每虞寡陋聞未聞見未見喜遂趨承荷屬意於作成特增田而贍給經籍寵畀輪奐鼎新遂臻衿佩之翕從頓覺庠序之改觀皆公所賜揣已何功方深懷欣幸之私詎復興僥求之想敢圖矜



念亟賜薦揚斐然弗知所裁豈識作文之體不至阿其所好曷當守正之褒刺奏一飛價增十倍茲益恭遇某官兩京循吏一代真儒嘉善而矜不能實根素稟舉直而錯諸枉庸示至公遂令寡援之蹤亦預兼收之數某敢不激昂所守洒濯其心對黃卷而師聖賢期於有用毀素節而求富貴斷不敢為以此律身是為報德

代學職謝鄒守啟

省少府而買刀布尚高循吏之稱捐私幣以給生徒尤



見清風之凜于今幸遇自昔未聞敢效泮宮之詩少置  
中涓之謝載惟鄆水僻在閩陬雖庠序之僅興然廩稍  
之未繼累蒙賢守興念諸生或增養士之田或賜在官  
之宇用裨供給粗免煎熬夫何變起於鬱攸又復恩加  
於減放利源寔少方虞必絕於陳糧寒谷頓回不意忽  
逢於鄒律茲蓋恭遇某官西京良吏東魯真儒訟理政  
平春生田里內備外禦影滅姦偷恩威已著於一方禮  
貌並加於多士寵頒羣籍盛葺儒宮遠慮深思欲為後



日無窮之計視饑由已特捐舊比當得之金寧將清白  
以遺子孫乃置膏腴而贍學校搢紳興歎韋布均懽咸  
曰秩終孰不匱金而囊帛卓然見遠獨能重義以輕財  
某等敢不戴德丘山銘功金石自今以始歲其有成蒙  
飲食之恩惟學遜志敏厥修當佩菑畲之訓冀收末效  
仰答洪私

謝除國子博士啟

馳書光範方伸惆悵之私職教宗庠遽辱甄陶之賜得



踰望外愧溢情涯竊惟學校之興無若國家之盛左開  
黌舍右設武庠至于國子之俊髦復隸賢關而教養第  
惟皇族久缺學宮經之營之既一新于輪奐賢者能者  
遂悲補于生員欲陶麟趾信厚之風當賴鴻儒作成之  
力如某者藿鹽太學燈火寒生無令聞廣譽以施諸身  
乏前言往行以蓄其德誤辱知於上袞遂廁跡于周行  
掌故甸師濫叨庀職成均胄學薦玷橫經負丞深愧于  
僥踰丐外未蒙于俞允欲養而親不逮既惟素韜之悲



投閒乃分之宜無復清都之夢忽疏恩于宸扆俾竊廩  
于宗黷緬思是學之初興嘗兼訓諭不謂修門之再入  
復忝師儒揣分奚堪歸恩有自茲蓋恭遇某官忠貫日  
月勲塞乾坤厥亦惟我周王方受維新之休命時則有  
若伊尹每懷不獲之匹夫俯矜簪履之遺久託鑪錘之  
內謂若居壁水已粗知教育之方今欲訓金枝遂使預  
選掄之末某敢不策蹇磨鈍溫故知新空空鄙夫雖莫  
任範模之責振振公姓當率為禮義之歸依向彌深敷



宣罔既

得浙東帥幕謝廟堂啟

魏勃掃曹相之門荐瞻衮繡石生入烏公之幕誤辱陶甄施重如山感深至骨竊觀近代宅揆之任莫如今日用人之公爰度爰咨必加精審或用或舍自有鑒裁搜羅罔間於邇遐東拔尤先於寒峻肆令寡援亦預兼收伏念某猥以諸生濫塵甲第采魯泮之藻比及三年代齊戍之瓜亦既數月竭來京國晉拜公台吹噓既乏於



先容陶鑄敢求於近次豈期矜憫曲賜生成謂寒士歡  
顏俱託萬間之庇矧小人有母正資三釜之供俾易贊  
於帥垣庶亟霑於祿養春回寒谷已逢吹律之工日近  
長安尤有向陽之便始願誠不及此自謀何以過之茲  
蓋恭遇某官奕世鈞衡清朝柱石輔贊彌縫而藏諸用  
仰大化之密移連卷詰曲各安所施雖寸長而不棄自  
慙頑鑿猥入洪鈞敢不仰戴洪恩益殫駑技覽禹穴會  
稽之迹庸激壯懷預平淮東閣之招尚期異日士仲知



已書不盡言

代謝廣文啟

授弟子於國中方闡孟軻之教召秀才於門下盡求賈  
誼之賢豈意疎庸遽蒙招置雖賴先容之助亶為幸會  
之多伏念某命與時違勞而功少鼓翼兩隨於鶚薦暴  
顯復困於龍門一第是期價敢矜於積玉雙親已老教  
深負於簞金茲該免於鄉書將與偕於計吏謂決科發  
策要當就有道而正焉而樞衣趨隅每願事大夫之賢



者幸逢哲匠來典儒宮招而誨之方執經在諸生之列  
與其進也俾託身於廣厦之間靖言人耳人耳之資曷  
稱師哉師哉之命第欣朽鈍獲遂依歸恭惟某官挺秀  
儒林蜚聲黌舍錦心繡口溢為筆下之詞章玉季金昆  
總是人中之英傑早由豹變暫屈鸞棲必也使無訟乎  
已鞠園扉之草予私淑諸人也來觀泮水之芹惟大賢  
無所不容占小善亦率以錄遂令頑鑿亦在洪爐雖不  
模不範深負揚子務求之意然小成大成冀親宣尼善



誘之功

謝除司令啟

充員故府慙無毫髮之勞列屬奉常忽拜絲綸之寵陶  
治實由於洪造感藏尤極于丹衷惟今日藉田之官即  
古者甸師之職是穠是裝已臻黍稷之豐迺積迺倉庸  
備染盛之奉既專供于歲事爰分隸于容臺無簿書期  
會之勞亶為清簡非粹潔端方之彥曷副選掄如某者  
蹭蹬腐儒奔馳薄宦既無甚高論足以譁世豈有他謬



巧用以致身汙泮終更僅逃瘵曠槐庭晉謁初乏吹噓  
豈期特達之知遽軫生成之念謂小人有母正資三釜  
之供俾寒士懼顏特畀一基之次竭來帥幕甫閱歲華  
復被命于玉宸獲效官于金部盈几閣而徧睹第粗知  
職守之勤無效績之可書安敢起序遷之想過辱太鈞  
之播進升帝籍之司揣分奚堪捫心知愧茲蓋恭遇少  
師樞使丞相國公夾邦哲輔命世真儒厥亦惟我周王  
方賴以寧之多士時則有若伊尹每懷不獲之一夫故



微賤弗忍於遐遺而巧拙或容於雜進某敢不益堅素  
守仰答殊知俎豆之事嘗聞第謹馨香之薦檮櫟之材  
何用尚祈培植之私戴德何窮占辭曷既

謝除郡啟

久玷郎闈恐妨賢路欲自全於進退遂荐瀆於威尊正  
虞干斧鎖之誅安敢冀甄陶之寵自天而下忽膺宸命  
之頒遵海而南俾任侯藩之寄况瓜期之將及距梓里  
以非遙退省其私實逾所望相國之賜大矣當懷報稱



之私中心何日忘之曷喻感藏之意亟脩謝牘仰紊記  
曹尚圖瞻赤烏之光庶獲罄丹衷之悃自慙晉躡倍極  
凌兢

代謝特薦啟

究心備禦每虞負推轂之公指日終更乃復被剡章之  
寵感恩甚厚圖報蔑然竊惟趨事以赴功難遇賞音而  
知己一經題品已為此生際遇之榮再沐推揚尤荷大  
造生成之力第慙拙政莫稱華褒伏念某拳曲散材迂



疎末學脩身踐行粗知廉勤靜退之方行法涖官曷副  
通敏強明之譽猥辱從臣之薦濫叨偏壘之司庶民無  
愁歎之聲雖安田里隣壤有跳梁之警尤費隄防適當  
瓜戍之更誤沐囊封之奏俾留經理敢憚艱勤內供士  
卒之餼糧外固封陞之關隘凶徒潛弭闔境粗寧幸逃  
瘼曠之虞實賴照臨之庇敢祈褒寵特賜薦揚茲蓋恭  
遇某官歆向才華間平風度以錦幄名郎之舊膺繡衣  
出使之權清節照人凜凜冰霜之厲公心察吏拳拳涇



渭之分遂使駕庸荐叨提獎某敢不激昂所守洒濯其  
心非俗吏之所能為願益堅於素學觀近臣以其所主  
期仰副於深知

謝葉帥闕陞啟

文闡校藝夙遭衡鑑之公薦牘陳詞復被甄陶之賜始  
終僥倖俯仰兢慚竊惟初仕之進身悉用上官之陞削  
然薦員之既狹欲溢額以尤艱必得其三庶遂掘井及  
泉之願倘缺其一豈無為山虧簣之虞過辱曲成竄為



幸會伏念某簪纓末緒燈火寒生差延賞於旬月之間  
已絕意於雲霄之望託身黌舍偶叨再薦之書射策彤  
墀浪廁七人之列竭來分教深愧固功成期已迫於及  
瓜舉削尚虧於合穎無可棲者豈勝繞木三匝之思因  
而成之正賴中流一柱之助敢期特達曲賜推揚第斷  
斷以無他莫副純雅清修之譽非循循而善誘曷當師  
表模範之褒刻奏一飛增價十倍茲蓋恭遇安撫尚書  
政成帥閫命錫帝庭行以公歸晉陟上台之位先從隗



始廣收束閣之才遂使冷官亦逢暖律某敢不激昂所  
守洒濯其心對黃卷而師聖賢期於有用毀素節而求  
富貴斷不敢為以此律身是為報德